

Mabadiliko ya Makubwa Yanapaswa Kufanywa,

Mpate kuwa wana wa Mungu wasio na lawama, wala udanganyifu, wasio na ila kati ya kizazi chenye ukaidi, kilichopotoka; ambao kati ya hao mnaonekana kama mianga kati ya ulimwengu. Wafilipi 2:15.

Wakazi wa mbinguni wanatarajia kuona wafuasi wa Kristo waking'aa kama mianga ulimwenguni. Wanapaswa kuonesha nguvu ya neema ambayo Kristo alikufa ili kuwapatia. Mungu anatarajia wale wanaoitwa Wakristo kuonesha ukuaji mkubwa wa Ukristo katika maisha yao. Ni wawakilishi wa Kristo, na wanapaswa kuonesha kwamba Ukristo ni halisi. Wanapaswa kuwa watu wa imani, wenye ujasiri, waliojitoa kikamilifu, ambao pasipo shaka yoyote wanamwamini Mungu na ahadi Zake..

Wale wote watakaoingia katika mji wa Mungu lazima wamweke Kristo kuwa wa kwanza katika maisha yao hapa duniani. Hiki ndicho kinachowafanya watumishi wa Kristo, mashahidi Wake. Wanatakiwa kubeba ushuhuda bayana madhubuti dhidi ya matendo maovu yote, wakiwaelekeza wadhambi kwa Mwana-kondoo wa Mungu, aichukuaye dhambi ya ulimwengu. Wote wanaompokea anawapa nguvu ya kufanyika wana wa Mungu. Uongofu ndiyo njia pekee ambayo kwayo tunaweza kuingia katika mji wa Mungu. Ni njia nyembamba na lango tunaloingilia limesonga sana; lakini ni kupitia kwa hiyo tunapaswa kuwaongoza wanamume, wanawake na watoto, tukiwafundisha kwamba, ili waweze kuokolewa, wanapaswa kuwa na moyo mpya na roho mpya. Tabia za kale za kurithi lazima zishindwe. Tamaa za asili za moyoni lazima zibadilishwe. Udanganyifu wote, upotoshaji wote na maongezi maovu yote yanapaswa kuachwa. Maisha mapya yanayofanya watu kuwa wanaume na wanawake wanaofafana na Kristo yanapaswa kudhihirishwa.

Sharti kusiwepo na maisha ya maigizo katika maisha ya wale wanaobeba ujumbe mzito na mtakatifu ambao tumeitwa kuubeba ...

Wale wanaompenda Kristo wataishi sawa sawa na mapenzi Yake katika maisha yao. Wamechagua kuwa upande wa Bwana hivyo maisha yao yanatakiwa kusimama kinyume na maisha ya ulimwengu huu. Mjaribu atakuja kwao akiwa na vishawishi na kuwadanganya akisema: "Haya yote nitakupa, ukianguka kunisujudia." Lakini wanatambua kwamba mjaribu hana chochote cha thamani cha kuwapa na wanakataa kutii majaribu yake. Kupitia neema ya Mungu wanawezeshwa kutunza usafi wa kanuni pasipo mawaa. Malaika Watakatifu wapo pembeni mwao na Kristo anajifunua katika msimamo wao unaopatana na kweli. Wao ni askari wa Kristo, wakidhihirisha, kama mashahidi halisi, ushuhuda thabiti unaopatana na ukweli. Wanaonesha kwamba kuna nguvu ya kiroho inayoweza kuwawezesha wanaume na wanawake wasiweze kuyumba hata chembe kutoka kwenye kweli na haki kwa zawadi zote ambazo mwanadamu anaweza kutoa. Watu wa aina hii, mahali popote pale watakapokuwa, wataheshimiwa na mbingu kwa sababu wamekubali kuishi kulingana na mapenzi ya Mungu, bila kujali ni kwa kiasi gani wanatakiwa kujitoa (Testimonies for the Church 9:22-24).